

偶

齋

詩

草

偶齋詩草外次集卷三

無謂集 己巳

宗室寶廷竹坡著

八月廿九日集陶然亭分韻

疎林寒有聲遠山澹無色夕照上荒城一片蘆花白

佳日集高亭同遊盡騷客西風漸作寒蘆花已舒白古

木聚秋聲斜陽表山色酒闌詩亦成揮毫題破壁

蓮浦謠用飛卿元韻

薰風澹澹波溶溶畫船搖風西復東風牽畫船入花裏
霞臉映波花不紅歌聲宛轉聞溪上涼風拂水溪生浪

花香人氣兩難分芬芳一片隨風蕩

又 不次韻

荷香澹蕩南風暖綠蒲繞岸清波滿小姬蕩槳入花叢
花風宕漾歌聲緩花裏期郎郎不來船頭獨立自徘徊
折得新花含笑問問花何日并頭開

偶成

天地盡虛幻古今同悠悠人生本無樂何事云有憂眼
前雖無酒清茗方盈甌舉甌一吸乾聊以潤渴喉

秋風吹落葉繞屋聲蕭騷把卷坐堦前晚涼侵敝袍仰

首望太虛不覺塵心消有命代經營何須自覓勞

秋日田家

暮秋百穀成田家多樂事村醪近可沽日日飽復醉鷄
黍招近鄰觴酌無倫次醉後坐荒田時共兒童戲春苗
種已徧青青滿平地衣食幸無虞高枕可安睡

烏夜啼用太白韻

隔牆密樹烏亂棲紛紛見月中宵啼房中獨坐誰家女
悶對銀缸悄無語自起開門見月光滿庭落葉聲如雨

秋夜曲

無語立空堦西風涼透骨舉頭望中天猶是春時月

與鏡寰宿敘九家聯句

白酒同權飲鏡良宵共苦吟燭光搖客影敘香氣沁詩

心遠析隨風盡竹清鐘逐月沈相將休閒夜鏡只恐曉

寒侵敘

與文鏡寰宿皆平家

荒園寂歷絕風塵促坐深談意更親四壁秋蛩窗有月
數聲寒犬巷無人長宵暢敘渾如短舊友重逢倍覺新
同是世間淪落客相看何必淚沾巾

與鏡寰皆平同宿憶李敘九

殘月半天白詩人何處眠相逢纔幾日小別恍如年
命薄天難福才高世豈憐良朋共歡聚相憶倍淒然

同用賓訪鑒西遇秀鎮五遂過酒家飲折柬招子

美靜軒小昉飲至二更始散同用賓至家聯句

閉門三日雨

用

躊躇無所事今朝得相會

竹

之子不我

棄攜手訪良朋

用

聯肩過荒肆騷人陸續來

竹

不速先

後至座間無主賓樽前共醒醉論交有忘年

用

談心盡

解意燈影落杯紅

竹

苔痕粘屐翠化雀擲瑤盞探驪拔

錦幟大笑詠而歸

用

小酌惠不費

竹

相將至君家

用

同

歸剩吾輩剪燭話文心烹茶帶書味雲低窗影深風緊

柝聲碎坐久竭歡情談深動愁思

竹

嘆息淚零雙

用

淒

涼人對二樂境慨難久

竹

勝事忽如墜浮生本虛幻往

境猶夢寐世路滿荆榛人情現魍魅廉頗惟善飯犀首

空含淚不如且酣飲

用

隨意同遊戲窮達聽之天

竹

福

命稱其器可與知者道

用

難受俗人愛酒可破窮愁

竹

詩能吐豪氣何日重把握

用

開懷作佳會

竹

贈小舫

去年見延小舫舉止端嚴氣清爽今年見延小舫譚笑
風生慙倜儻今君故君原無殊忽歛忽縱何分途豈君
變化故相眩抑或君視故吾非今吾攜君千里之詩與
我觀出君廿年之作與我看詞清筆健耐尋繹毫端百
丈飛狂瀾開篇一讀一擊節千里山川廿年遭際盡現
雙睛前奇愁怪樂寫絡繹危峯險水書連綿天才踴躍
熱淚迸使我展卷心忤然讀詩淚頻洒滿腹窮愁慘難
寫倚窗悄坐默無言西風捲樹敲屋瓦

羅宿集

丁卯

上元郊遊

綠河小逕潤無泥散步閒行路不迷古寺荒園寒樹外
夕陽殘雪斷橋西郊原寂歷人難遇村舍蕭條烏亂啼
竟日遨遊饒逸興新詩到處可留題

贈泉麓兼寄丹五翰生

昨尋吳泉麓今尋吳泉麓朝尋泉麓談夕尋泉麓宿泉
麓有酒任我斟泉麓有書隨我讀掃泉麓牀讓我眠奪
泉麓衣將我覆相交匆匆未半年入室升堂路已熟去
年識君由孫郎訂交不久已遠行今年因君知岳子

壁閒

有岳翰生詩頗佳并聞有下咫尺渾疑隔萬里緣難緣
交之語現客武邑不能卽見
易兩懸殊難免枉悲復枉喜大笑呼天公爲我發狂風
吹回二子燕京中使我四人賦詩飲酒旦夕同相從

懷丹五

因君得識吳泉麓今夕同談卻少君三載相思緣枉結
半年懽聚手先分孤帆冷挂衡陽月歸雁寒衝塞北雲
何日騷人重把握金樽共倒醉紅裙

弔李文正公墓用法梧門先生韻

古塚千年喜尙存好賢誰似法梧門
短碑修潔空留記

宰樹摧殘已斷根，展墓有人來僻地。
承家無處覓慈孫，東風不解興衰異。
依舊吹噓綠滿村。

春夜

小園人寂寂，斜月淡無光。
不辨樓臺影，惟聞花草香。
水邊頻彳亍，籬畔獨徜徉。
散步幽懷暢，條然愁盡忘。

訪芷亭題以贈之

幽居無俗事，地僻絕塵埃。
小院多芳艸，閒庭蔭古槐。
書因沽酒賣，客爲乞花來。
車馬休輕至，柴門不許開。

卽景

溼雲漠漠覆遙空一片寒烟遠近同
野樹迷離山影暗滿村風雪杏花紅

卽事

柳外月初上水邊舟自行推窓望江口
一片浪花明香霧侵人溼和風拂樹輕
條然幽興愜援筆句頻成

上已後一日偕芷亭敬之遊慈壽寺題壁

把盞平臺上東風吹酒醒佳晨慚枉度
勝地喜重經

二月

廿八日曾遊此約上

一塔樹閒白數峯花外青斜陽看

已再遊因事未果

漸下游屐恨難停

訪芷亭不遇

待君君不歸戀君不忍去殘雨帶斜陽隨風落高樹

和芷亭見贈韻

萬事蹉跎盡不成讀書深愧盜虛聲禍猶未免何求福
利尙難謀敢望名自喜此生終有死已知今世盡無情
憐才幸遇高人在且向詩壇結夙盟

業海迷茫入轉深手援空負我知音痴情驚醒三生夢
壯志灰殘卅載心地下自應無凍餒人間誰暇問升沉
從今不作飛騰想擬戴黃冠共苦吟

窮奇集

病瘡

山在頭海在腹冰凝心火生肉幽明轉眼幻迷離冬夏
片時增反覆有時徹骨寒難禁風霜凜冽摧重衾有時
灼肌熱難避遍體炎歊騰暑氣炎涼變化魄魂飛側身
直欲忘天地我聞瘡鬼怕聞杜陵詩髑髏一誦當名醫
又聞瘡鬼畏說石虎勇虛名一喝神先竦如何今獨不
憐才昂然竟向詩家來豈伊傳言荒謬不可信抑或鬼
先識我非真材大聲呼窮神爲我祛邪氣廿年依處常

相親胡不力除陰慝安吾身神兮神兮休畏鬼吾使詩
魔來助子

三君子歌送岳翰生還武邑幕兼寄孫丹五呈吳
泉麓

有客有客字丹五才調鮮妍貌清古有客有客字翰生
才華燦爛饒風情有客有客字泉麓才比精金質如玉
去年丹五遊粵西一去萬里音書稀今年翰生返京國
相逢未久歸期迫惟餘泉麓難家歸京華落魄同吟詩
天南地北共奔走四方奔走求餬口山分水別各飄零

杳杳歸程難聚首嶺南之地何迢遙武邑之地何蕭條
京師之地何塵囂四人三地悵離別有詩有酒難相招
旣無點金方又無縮地訣窮愁離恨同淒絕詩成擲筆
淚頻流斜陽漏影寒雲裂

秋江曲

西風颯颯搖寒漪芙蓉帶露開離披美人蕩舟出花港
翠鬟散亂隨風欹橈聲咿啞作人語花氣侵人潤如雨
半晌停橈不忍歸一片斜陽渡秋浦

秋郊獨步

寒雲覆遠山斜陽出復沒木落秋草黃荒城連野闊獨
步古村邊西風涼透骨秋光倍慘悽戚戚愁欲絕

粵西謠送榮吉甫先生之粵西兼寄孫丹五

山石崔嵬青天低海水汪洋大地窄毒蛇怪象阻行人
蜚雨蠻風迷日月迢迢一萬二千程此去粵西地彌惡
送君粵西行試作粵西謠粵西之地何遙遙崎嶇險阻
縱難度異景靈境到處堪遊遨芒鞋竹杖可適意何況
顯耀隨星輶

先生在學使
楊子和幕

泮洞之水桂林之山羅池之

廟崑崙之關古跡處處同登攀鯨濤鯢浪逐遊棹蠻花

犵鳥隨吟鞭，苗風夷俗盡。
入錦囊內，險教佳句壓碎。癸
奴肩去年送孫丹，五今年送榮吉甫。
年年詩人遊粵西，惡地於今成樂土。
南軍從此大有人，競捷爭雄鬪旗鼓。
粵中多奇景，二公多奇詩。
奇詩奇景同相宜，只愁奇絕不入人。
思議致使山慚水，忤不敢相爭奇。
抽毫洗盞送君去，一片蠻烟塞行路。

送吳泉麓

我欲留君不能住，我欲從君不能去。
離亭酌酒送君行，此去悠悠向何處。
山之東海之西，萍蹤飄渺難相思。
燕

之南趙之北別路迷離枉相憶驪歌一曲客登程手挽
征衫牽不得天蒼蒼地茫茫山昂昂水洋洋征車發千
里道路何悠長行者去兮不可留居者鬱結多煩憂居
行彼此兩無謂相看清淚緣纓流明朝分手各離散今
日樽前且留戀

訪芷亭不遇

君行已數日訪君猶未歸獨立古堦下繞窓黃葉飛

醉時歌

春秋冬夏不知此何時南北東西不知此何地喜怒哀

樂不知此何情禍福吉凶不知此何事茫然苟活天地
閒夕寐朝眠日沈醉有酒胡不酌有詩胡不作有錢胡
不用有樂胡不樂勸君今日且莫愁生前死後同悠悠
勸君今日且莫笑古往今來本同調或哭或笑總徒然
爲我爲人皆可悼秋風輕兮秋月明秋天澄兮秋夜清
當此不樂良虛生神仙之樂何虛無富貴之樂何拘墟
醉鄉之樂何寬舒我今不樂將何如我今不醉將何如

西郊獨步

曳屣步荒郊平原路重疊古寺枕寒流疏林半黃葉一

眴自徜徉條然神思洽愁懷已盡亡頓覺心安貼

二海歌贈古階平王公玉

古粵人
王齊人

東海滔滔波接天雲濤烟浪茫無邊中有靈境棲神仙
南海浩浩莽無地龍宮蛟室生雲際胎珠孕寶饒奇異
南海氣不散挺生古階平高才兼絕學百粵蜚英名東
海氣不散挺生王公玉詩酒仰高風超然邁流俗二海
悠悠流相通二公渺渺難相逢天南地北限方域孤吟
獨詠睽游蹤忽焉南風發吹送階平至京室忽焉東風
興吹回公玉來燕京遂使天涯海角兩詩客來與竹坡

日下聯詩盟階平詩筆多溫柔公玉詩筆多風流竹坡
詩筆多窮愁才殊境別互歧異情同志合相綢繆西風
蕭蕭白日短斜陽慘慘落葉滿鑒詩鬪酒渾忘晚曳屐
攜壺不知遠大快吾儕詩酒性那顧時人青白眼鼎立
騷壇互戰征人是人非誰暇管安得與君同遊東海中
持盃索句蓬萊宮三山分占爭豪雄安得與君同遊南
海上手拍珠崖戲風浪珊瑚樹下相酬唱而今二公不
能偕我歸且留京國與我同吟詩

和公玉

何須覲面始相親
交誼誰云別舊新
塵俗那能容我輩
蒼天有意聚詩人
可憐絕調風流客
都是窮途落魄身
海角天涯同聚首
騷壇唱和總前因

題畫山水

青山一片當牀立
迷離滿壁烟嵐溼
生綃幾幅挂中堂
蒼翠森然照雙睫
墨痕筆跡無埃塵
蒼茫紙上生烟雲
遠神遠勢迥無比
指端神妙超羣倫
奇峰峭拔秀可數
流水漫漫繞門戶
傾耳不聞西風聲
寒林落葉頻飛舞
高低三面排青嶂
依稀風景西湖上
江南江北好山多

易地移形空想像憶昔奉父西山陬昆明湖畔曾勾
留山光水色兩清絕佳景與畫頗相侔自從戎馬東郊
起父子無家共轉徙湖山錦繡盡成灰奇蹤異跡同銷
毀一家八載歎流離市井飄零罕棲止回頭怕看故山
青事親無地難爲子凝眸對畫淚頻流撫時感事悲難
已何時重作畫中人嶺畔窮畊供甘旨

初夏卽事

小齋獨坐淚頻垂欲寫愁懷嬾賦詩若爲春歸增感慨
春歸原有再來時

仙

金丹一粒妙無窮
悟徹元關大道通
來往何妨在人世
死生原不聽天公
崑崙雲起聞風白
蓬島日升滄海紅
雲境迢迢果何在
幾回翹首望琳宮

龍

飛翔敢望向天衢
大海波寒螯未蘇
失水何能作霖雨
無雲自合困泥塗
眞形不識奚勞好
奇禍難逃莫憚屠
歎息王孫憔悴甚
休矜種類與凡殊

蜨

錦城香國儘勾留
栩栩雙飛不解愁
一院落花春晝暖
半堤芳草午風柔
已拋好夢猶生戀
欲采餘芳自覺羞
轉胸繁華盡消歇
狂蜂無賴悔同遊

清虛觀卽事

人靜小亭空
昂頭獨高眺
斜月冷無光
星繁碧天少
朔風促嚴寒
木落霜林老
感此時物移
慙焉心如擣

偶成

開門看明月
滿徑雪花飛
小院絕人語
峭風吹我衣
繞牆松影重
隔巷柝聲微
獨立幽懷適
悄然無是非

冬夜

孤月不知冷夜深猶在天樓明微有雪樹遠淡如烟默
默愁難訴悠悠情自牽徘徊曲廊下低首淚潛然

別眼鏡

維仲冬中旬貧極益以病薪水不能供無聊售眼鏡欲
售難割愛摩挲不忍離恍惚見鏡神開口前致詞鏡神
對我言從子頗有日一旦遽相離未免情難割溯我從
子來於子頗有功胡乃不思舊棄擲不相容子目少靈
光昏昏難遠視今與我相離雙眸暗何恃水光照地白

山色迷天青子今無我助何以觀眞形秋花匝野黃春
草連城碧子今無我助何以分顏色孫壽善齟齬東施
工效嚙子今無我助妍媸何以分蠹東十萬言蟬編五
千卷子今無我助迷離何以辨我常念子苦子何忘我
功屏棄弗相惜無乃心非公我去子腹充我留子目快
重腹而輕目無乃太偏愛譬如好友朋朝夕恆相隨決
然竟舍去能無心傷悲譬如美妻妾日夜同相伴決然
竟舍去能無心留戀我聞鏡神言不覺心淒愴含涕告
鏡神非我心太涼從我三五年豈不念子德飢寒兩交

攻欲留子不得上不供甘旨下不安號啼區區玩好物
留子將何爲愧我少遊資足不出百里送子他家去徧
看佳山水愧我多俗冗花柳疏遨遊送子他家去四時
同尋幽愧我少良緣無福得裙帶送子他家去飽看粉
與黛愧我書囊空無力購書看送子他家去恣意窺瑤
編如彼友與朋交誼兩難絕時勢橫相迫亦復忍情別
如彼夫與婦恩義兩不疑時事不容緩亦復忍情離世
事多變更到處饒新異我今與子別少見當時事人情
恣詐僞對面迷假真我今與子別少見當時人留子我

固佳去子我亦好去留亦偶然何必縈懷抱子旣難我
忘我豈不子思無物送子行聊存一首詩

陽生集

卽景

夢醒披衣起空齋夜氣清開門月光上滿地雪花明庭
樹淡無影鄰鐘時有聲徘徊短檐下仰首看雲行

詠史

矜才使氣互評譏妙論空多正論稀我欲拈毫斷前事
躊躇恐惹後人非

高談雄辨總空虛
東冊何勞載五車
可恨秦皇生太早
不燒三代以還書

世事匆匆如轉輪
盛衰彈指盡成塵
無情最是古時月
猶向書中照古人

雪中待芷亭不至戲題

待君踏雪訪寒梅
底事黃昏尙未來
想是高人工學古
到門不入竟車回

宿清虛觀

地爐閃閃火猶存
欹枕驚聞宿鳥喧
六扇紙窓明似舊

月光曙色換無痕

艸木蕭條小院空
淩寒獨立玉堦東
隔林透出朝陽影
滿地霜華半染紅

入官集

戊辰

元日偶步

西郊曳屐獨徜徉
剪剪輕風透骨涼
一片荒田積殘雪
半村枯木帶斜陽
遠山慘淡連城碧
衰草迷離遍野黃
可惜囊空難買醉
聊將俚句寫韶光

元日訪文鏡寰聯句

新年訪故人相見各懽喜竹晴窗啜清茗無煩沽綠螳

鏡我本多愁人君亦微寒士竹人生幾何年斗然又歲

始鏡老壯雖不同轉瞬同歸死竹□□兩心知莫逆笑

相視鏡斜照下空庭炊煙隔牆起竹殘雪凍不銷北風

吹不已鏡感此時物變淒然悲難已竹有意尋梅花春

冰賦屐齒鏡

戲成

窮居三十載僥倖成微名顯耀自不解鄉里同爲榮榮
辱亦何有凍飢難安生外彊而中乾誰能知此情

端陽戲書

瓊島難營避債臺
窮神竟許住蓬萊
端陽更比重陽酷
贏得催租日日來

得意春風亦枉然
長安走馬讓人先
杏花不及榆錢好
僥倖攀來劇可憐

秋草和文鏡寰

賸碧殘黃一望平
秋光慘澹客心驚
斜陽遍地馬羣卧
落葉滿山蟲亂鳴
南浦迢遙空有夢
西風蕭索太無情
王孫歸去音書絕
極目天涯淚暗傾

秋柳

萬樹韶光轉，
眴非殘黃剩碧。
尙依依雨晴灞岸，
葉亂下霜滿玉關人未歸。
猶憶柔條臨大路，
空餘弱縷挂斜暉。
顛狂卻讓荒蘆絮，
得意漫天作雪飛。

寒烟冷露倍淒淒，
迴首青春夢已迷。
落葉有心留漢苑，
夕陽無語下隋隄。
枚乘賦好愁重誦，
白傅詩工怕再題。
最是流鶯太情薄，
從今不向樹間啼。

一回攀折一潸然，
淚洒荒園薄暮天。
使韓翅悲往日，
不堪張緒憶當年。
殘條嫋娜憑誰續，
敗縷凋零但自憐。

莫道風流消歇盡情絲欲斷尙纏綿

瘦損纖腰力不支蕭疎辜負好丰姿未知青眼重垂否
尙記柔枝乍折時春色可能仍似舊秋風何苦太相欺
阿誰移種深閨裏翠縷金條細護持

採蓮曲

柳陰滿岸薰風香畫船
咿啞花中央歌聲飄空不知處
波光一片迷斜陽
采蓮采蓮誰家女
鬪艷爭妍戲秋浦
新妝時樣倍嬌嬈
顧影迴波自矜許
三三五五戲花中
覓蕊尋香意倍濃
回眸一笑臉桃綻
卻使蓮花不忍紅

湖南湖北行飄忽桂櫂穿花出復沒水氣薰香疊翠裙
露珠沾透凌波襪采蓮采罷早歸家雙雙畫漿隨波斜
入門含笑呼阿母儂今采得并頭花

少年行

敗葉飄零徑草死樓閣摧殘剩遺址道傍老翁向人言
此宅曾居貴公子

塞下曲

雪滿天山朔氣涼玉門關外月如霜自知征戍歸無日
不忍回頭望故鄉

銀刀血染戰袍殷繡幕傳杯夜始還醉枕骷髏卧關上
一輪明月出天山

落葉

疎黃冷碧盡成空四野秋光逐烈風
市地飄零頻下上連天飛舞各西東
栖鴉幾樹夕陽外枯木半村寒雨中
競密爭繁千百種到頭凋謝總相同

三更冷雨雁孤唳萬壑秋風猿亂啼
片片飛連峰左右紛紛落遍嶺東西
淩空飄洒渾如雪繞地翻騰半作泥
欲挈酒瓢尋道士滿山煙靄逕皆迷

捲地秋聲漸作威縱橫到處自霏霏月明古寺鳥初宿
霜滿空山僧未歸歷亂隨風連岸舞飄颻竟夜繞村飛
寒砧斷續音催急誰寄遼陽九月衣

金風幾日屢吹噓高樹涼歸蔭漸疎楊柳池塘霜落後
梧桐庭院雨晴初深宮怨女曾題句香剝才人正肄書
卻憶小園當孟夏濃陰千畝護茅廬

秋來無處不淒涼搖落江天倍可傷冷翠打殘連夜雨
亂紅飛盡五更霜蓼汀波淺花齊謝楓浦濤寒草漸荒
景物蕭條堪浩歎羈棲况是在他鄉

慘澹秋容畫不成滿園黃落助詩情半庭斜日無人掃
一逕荒苔有鹿行爛漫斂痕添野色飄蕭幾處起商聲
誰家此際書方讀檢點殘紅妙句賡

繞牆枯樹響颼颼打砌敲窓落不休露葉翠飄三逕月
霜痕紅漾半池秋零星屢費園丁掃鮮艷頻勞稚子收
恰喜遠山同現出好呼良友共登樓

初冬

靜室閒無事優遊逸興賒避寒移架鳥就日徙盆花僕
嬾忘沽酒兒愁學煮茶幽居遠塵俗車馬絕喧譁

寒序饒佳景窮居俗慮忘早梅借春信晚菊駐秋光破
悶閒題句祛愁共舉觴詩成酒復醉終日樂徜徉
曳屐步荒野登高望豁然亂山分曉日遠樹聚寒烟鴉
噪平疇外駝鳴古道邊興來尋勝侶啜茗句同聯
斗室人朝起凌寒啟華門破窓吞日影斷壁裂霜痕瓶
凍花將墮爐溫火半存閒中多妙趣幽意與誰論

蘆花

羞向春原鬪紫紅白頭江上伴漁篷半塘敗葉西風裏
一片斜陽淺水中憔悴數叢依苦蓼鮮妍幾樹襯寒楓

無端吹落秋濤外
弱質飄飄似轉蓬

託根本自在江鄉
不與羣芳鬪艷妝
送客也曾歌瑟瑟
懷人幾度咏蒼蒼
涼痕輕捲一簾雪
秋色平鋪半被霜
敗荷殘菱零落盡
欲同晚菊傲重陽

曰壯集

春郊倣徐庾體

青陽饒淑景
原野春光濃
楊柳逐風綠
桃花帶雪紅
清流抱曲岸
遠山摩層空
遨遊樂無極
翛然忘愁悰

楊柳枝詞

龍舟南下錦帆開翠縷依依夾岸排借今日重來隄上
望滿隄楊柳盡新栽

垂柳千條弄晚風荒臺寂寞廡廊空無情最是西江月
照罷吳宮照越宮

春風吹損舊蛾眉翠冷青寒力莫支縱使他人未攀折
長條應不似當時

蜀都行送志理齋入蜀

石牛踏山山崩裂秦兵入蜀蜀國絕萬里蠶叢漂戰血
秦亡漢滅幾千年往來奔走嗟艱難劍門南上如登天

危城插天雲霞斷飛橋駕江波濤戰鳥驚獸懾行人眩
祠雞祀馬城築龜五丁化石望帝飛鬼城人邑陰陽睽
水流上天火入地虹冬雪夏炎涼替大漏小漏天難霽
送君西去何日歸沈醉莫辭傾金罍干戈滿地人踪稀

楊花

萬點飄飄滿太空淩虛飛舞任西東淡烟兩岸小橋外
春水半塘殘照中繞逕平鋪渾似雪緣隄亂捲不禁風
自慚我亦無才思題句輸他謝女工

東風吹絮遍平林白點紛飛碧水潄漂泊無衣遷客恨

游移不定美人心
隋堤感舊春愁重
灞岸傷離別意深
萬縷千條零落盡
那堪獨聽子規音

秀質纖肌畫不成
可憐體態太輕盈
無情已自沾泥盡
有恨重教入水生
蘆絮恰堪爲小像
桃花曾與訂同盟
江頭鎮日隨風舞
波滿橫橋雨乍晴

翩翻取次下疎枝
亂舞晴空別有姿
弱質那禁飛蝶采
芳心惟許落花知
遙堤日暖高霏處
小院風停欲墮時
莫道凋殘生意盡
青萍轉瞬滿深池

春曉曲

綺窗月落鴛幃冷畫屏銀燭紅無影花梢啼鳥兩三聲
淚染霞衾春夢醒夢醒孤枕淚頻彈遶西路遠再尋難
呼婢添香垂翠幕冰肌瘦盡怯朝寒春懷繾綣雙蛾鎖
象牀寂寞圍衾坐漏盡銀壺半作冰煙消金鼎微留火
烏輪皎皎照窗東獨坐妝臺恨滿胸塵染桂眉慵點黛
霞消桃頰嫩添紅妝成獨向花前立習習東風吹面急
夜來微雨落花多香泥滿逕弓鞋溼

春愁

愁緒逐時新匆匆又暮春小樓今夜雨錦帳去年人可

有重逢日空餘未了因東風劇無賴吹瘦苦吟身

楊柳橋邊路桃花水畔樓幾年歎離別何日復綢繆草
色添新恨鶯聲引舊愁春情消不盡獨坐淚頻流

擬元白放言

浮生何必問窮通聚散都歸二氣中天地有情終渾沌
古今無物不虛空扶持枉費聖賢力化育徒勞大造功
十二萬年成底事盛衰榮辱總相同

五千年事傷然過治亂空餘紙一堆殺運連綿開浩劫
敦龐盛軌幾時回兵戈洒盡英雄淚氣數摧殘王佐材

四海區區幾多地生爭死奪劇堪哀

託身貴賤總前因慧眼應知辨假真
木何嫌生穢壤
奇花不怕委風塵
殉夫苦節輸歌妓
報國貞心讓寺人
青史閒評增感慨
滿懷鬱結志難伸

山居樂

青山不許詩人去
整頓烟嵐留我住
一家飛出紅塵中
藏向雲霞最深處
山居之樂樂無窮
攀躋到處開心胸
天公賜我自然畫
四時變化無相同
四時佳景饒真賞
攬秀探奇絕塵想
一枝竹杖兩芒鞋
日與山靈作來往

仙分言直卷之三
浮名虛利何足云朱妍紫艷空勞神塵埃萬丈蔽白日
那能挽我山中人山居無事宜詩酒暢飲狂吟樂無偶
醉來得句刻山頭我與青山同不朽

夕陽

雲影蒼茫接暮烟平臯千里望超然數聲畫角古城外
一帶荒林秋水邊暝色漸看生遠樹餘暉猶喜滿遙天
小樓杜牧吟懷健坐對殘暉妙句聯

晨鐘

殘月半窓暗寒衾初夢醒飄然一聲動滿院風泠泠欹

枕向誰語支頤空自聽思君不可見起坐涕頻零

壬申集

小院

小院無人語聞階立悄然隔牆花未放繞樹鳥初還微
雨漸成雪殘雲半作烟春寒不堪耐倚柱聳吟肩

和太白春日醉起言志原韻

處世若大夢何必貪吾生有酒即可醉狂吟步軒楹好
句懶人示得意聊自鳴倦來卧林下落花啼亂鶯枕臂
卽成眠渾忘玉山傾酒醒思昔賢索句抒幽情

鬼春詞

幽林寂寂草萋萋香霧冥濛曲逕迷
滿地落花斜月暗
子規叫斷古牆西

一縷香魂冉冉來夜深難覓舊樓臺
遙看欄外花齊放
猶是當初手自栽

閒情

陋室無人至幽栖野趣餘
避風移舊竹待雨種新花
倚枕時開卷圍爐自煮茶
貧居雖近市終日遠諠譁

幽興日無已閒遊意洒然
乞花尋野客沽酒借僧錢
草

碧乍舒帶柳青才著綿歸來身未倦晚飯小窓前

寨爾峪

山雨東來我西走突然相遇峪之口狂風四捲無處藏
蓋破衣汗水滿首急奔入寨不敢停南廊北厦人已盈
低頭聳肩立階上檐溜亂滴髮有聲雨珠流頸雨如汗
襟沾袖溼生寒戰立教首夏成秋冬一身頃刻四時變
峯頭忽露斜陽殷大笑呼僮重上山

鳳凰嶺暮行

疊嶂崔嵬越幾層黃昏曳屐下峻嶒山迴寺隔惟聞磬

經轉林開偶見燈嶺外微茫斜月暗峰頭驟隼暮雲凝
自慚濟勝良無具遙望高峯未敢登

過嶺卽妙峯因
疲不敢登矣

淵溝夜望妙峯

昏夜攜詩宿梵宮倚楹極目望溟濛四山鐘響暮雲裏
一逕燈光微雨中嶺岫幽深迷遠近林巒委曲忘西東
瓊樓峭拔懸天半金鼎香飄燄吐紅

登妙峯望南山雲

青山迴頭忽成海白波浩浩冲空起迷漫一片不見天
萬壑千巖頃刻改山僧向我言此是南山生白雲憑高

縱眺驚神魂霜烟雪霧飛氤氲素車白馬來紛紜急流
湧玉濤掀銀高峯峻嶺生狂瀾疑是山靈海若互遊戲
移形易象有意驚游人有時雲忽開半空一角伸危崖
有時雲忽合嶺岫迷離氣相接有時雲忽高峯頭截去
留山腰有時雲忽低山頂突出如著衣狂風一陣捲雲
過亂山厯落隨雲飛仰空大笑倚巖樹青山復歸海已
去

桃源

下山三四里有地名桃源緣山八九家寥落難成村微

雨昨宵過羣峯淨絕塵桃林已無花春意猶滿山徘徊
不忍去幽境娛心神何時結茅廬同作山中人

志伯石
同行

喜雨放歌

亂風四起狂雲奔電光繞屋雷車旋日韜月匿山川昏
萬條飛瀑垂青天銀河水溢天船翻急流倒注層雲穿
驚濤駭浪空中掀雲沾霧溼星辰湮列缺縱火雲欲然
豐隆擊鼓開天門神龍倒挂流腥涎掉尾挈水滄溟乾
五湖三峽雲中懸橫飄直洒如飛泉一泄不斷欲止難
急聲驟響當頭喧平地頃刻成深淵甘霖大降舒天

顏九州四海同歡然士吟庠序農歌田工慶市肆商賀
屢田祖助順催豐年滋禾澤黍生飢民雨暘時若無尤
愆海隅黎首同沾恩待看下溼兼高原稻梁黍稷盈陌
阡愧予才調輸坡仙抽毫誌喜成茲篇

三家店

孤村荒僻說三家雨後憑高望眼賒萬樹擁雲吞落日
亂山扶水走平沙重重嶺色連天遠曲曲河流抱店斜
興到呼僮沽薄酒詩成沈醉樂無涯

三家店卽景

一水帶殘照四山生白雲倚筇村口立拂拂酒微醺古
道聞人語荒田下鳥羣徘徊已昏暮野草發芳芬

寶珠洞題壁

人壓萬山立憑闌天地寬兩邱分海淀一綫走桑乾野
曠平田濶風狂烈日寒興來重登陟策杖上峯端

題香界寺下橋柱

萬樹帶新雨半山餘夕陽徐行下高寺橋畔立徜徉境
好嫌詩拙途危覺道長循坡復東去橡蔭照衣涼

桑乾

一水下西山東流山嶺閒奔騰二十里兩折復南還坡
陡飛濤猛沙深急溜灣蘆溝橋遠跨澗浪望迴環

華山謠送汪柳門

華山不許天在上奇峯高立青天讓蓮花一片天外放
枕秦壓晉橫雍州黃河東迴不敢流神龍卻行河伯愁
仙掌一擎三峯出嶄然四削平凹凸刮盡山膚露山骨
犁溝孤峻箭樞長峯西玉枕東車箱洞門雲氣霏靈光
石危路斷索垂鐵風遁身重索欲絕肘行膝走攀磴嶮
送君西去心神馳蒼龍落鴈同攀躋歸來示我登山詩

偶齋詩草外次集卷四

田盤集

壬申

宗室寶廷竹坡箸

通州

傍晚通州過嚴寒天氣澄暮烟一城樹殘雪半河冰瘦
馬嘶官道飢鳥聚古塍驅車行款段風急冷難勝

燕郊店中早起

昧爽披裘起淩寒敝破扉馬嘶人語亂月落柝聲稀荒
院雞頻唱高林鳥未飛東方看漸白相對理裳衣

雙峯寺

亂山夾深澗澗底生孤峰峭壁無寸土屹立洪流中雙
首合一身怪石堆重重跨山建香刹樓閣何穹窿我來
逢冬乾澗寒冰未融徘徊不忍去日落聞清鐘

田盤吟

久慕田盤勝登遊興欲仙有峰皆露石無寺不流泉
跡期他日藏真憶昔賢愧無康樂筆未免負山川

和張子真元韻

我愛田盤山處處堪歌詠同遊盡才人不負茲山景
會當恣遊遨攀躋遍峰嶺得句鐫山頭吟詩不知冷

公樂亭題壁

公樂亭邊結伴遊
嚴冬天氣似深秋
隔林茅舍隨山住
繞石寒泉帶雪流
厯亂稻根浮水面
蕭疎柳綫拂堤頭
依稀宛肖江南景
但可村邊繫小舟

少林寺

在盤山中路上山八里

勝境擬中岳
禪宮傳少林
亂峰藏谷口
孤塔表山心
曲折層岡迴迴環
巨壑深
詩人曾寄跡
撫壁憶高吟
壁有竹觚

古中盤

寺名慧因

當澗立古寺石臺五重起奇峰壓檐頭澗水穿屋底怪
石四圍立如獸復如鬼紫蓋接蓮花孤聳峭無倚慧因
顯盛名道場曾大啟惜哉哲人亡壯觀倏已毀

上方寺

人跡難尋鳥不聞茅山幽僻絕埃氛怪峰壓屋帶殘雪
巨壑繞牆飛白雲石草拔來和飯煮木芝拾取當香焚
老僧七十清修苦山色禪心兩出羣

東遊集

壬申

卽景

曲逕危途不憚攀果然天上勝人閒架梁作榭窓臨淵
疊石爲樓壁借山滿地烟嵐看恍惚凌空金碧望迴環
盛衰倏忽眞彈指伫立瑤階未忍還

古中盤

捫蘿重訪古中盤幽谷紆迴行路難急溜穴山衝屋底
危峰銜樹壓檐端殘碑字暗依稀辨峭壁詩多次第觀
莫道禪宮銷毀盡當年幾度聽鳴鑾

萬松寺槃阿精舍看雨

一片濃雲壓嶺來高樓把酒興悠哉四山飛雨撼孤寺

萬壑迴風翻疾雷絕淵奔流驚猛厲亂峰隱霧失崔嵬
憑闌大笑詩情動沈醉呼僧句共裁

青溝禪院弔拙菴禪師

國初人

廢院留青溝聲名當代重超超拙菴師酬唱偕王宋

拙菴

每與阮亭暨牧仲諸人酬和

高行禪門欽佳章士林誦慧因負盛名

相提堪伯仲

古中盤慧因寺大博禪師亦高僧也

我亦好吟詩孤行誰與

共倚杖立門前白雲滿古洞

下有文殊洞

東竺菴如如亭題壁

小亭對山立深院多莓苔嘉名標如如幽靜無塵埃開

窓怪石入倚枕松聲來良朋期不至懷古心悠哉

登舞劍臺題石

萬壑白雲湧孤臺青入天松濤翻鞞底塔影落矜前舞

劍思豪士題名讓古賢

上刻李靖舞劍臺唐李從簡曾遊十一字

登臨一長

嘯四望遍幽燕

和李觀瀾龍泉園落成元韻

隱居得佳境萬事復何求自有山林樂誰能名利謀高情同李愿逸趣匹田疇塵網幾時謝會當從子遊

小園隱幽谷水繞復峰還地僻愁難識岡平喜易攀竹

籬隨澗插蓬戶帶雲關不必勞筇屐窗中有好山

絕妙穿芳峪天教住此翁泉多難覓徑山密不知風夏
雨刈新麥秋霜蒔晚菘自饒農圃樂作苦付村僮

昔年隱西谷曾傍翠微居野老同攜酒山僧伴讀書才
疎忘仕宦性嬾羨樵漁何日掛冠去林閒共結廬

水車行

大雨三日山河鳴羣流倒灌白潞平陽侯一怒洪濤騰
波瀾萬頃凌孤城週村邇落同時盈吞禾含黍迷田塍
我來正值水方興積潦阻道心魂驚村氓指引示我程

云中有路渠能明捲裯揭幄縈以繩車箱設几人几登
壯夫六七夾車櫺驅車入水車如舡始入沒輪繼沒輪
襟袴頃刻黃瀾生左旋陷坎右墮坑隨波亂走行如盲
五步一跌十步停蹄斜輪側難支撐前車搖搖馬欲傾
羣呼力扶墜復升急流一道當車橫亂流直過行凌兢
水勢激鞍鞍將崩馬不敢前人扶行黑雲照水天晦冥
狂風四起奔雷霆駭膽慄魄肌如冰催車勇往生死
輕出水不遠入水仍習坎相接憂重增馬瘦人倦車難
憑失足屢蹶行弗勝四望無際濁流宏欲進無路退不

能冒危涉殆姑遄征咫尺性命嗟漂萍十里出險舟方
乘車中猶作波濤聲

自燕郊赴潞河水盛漲廿里之近從卯至申始抵
州城感而題壁以表行路之難

冒雨驅車返沿途積潦多城遙惟見塔水廣不分河大
野翻黃浪荒村湧白波京華看咫尺險阻歎難過

西山集

癸酉

偶成

天公珍韶光不使一時發輕寒錮餘芳春華暗蘊結敝

袍輕不溫颯然涼侵骨負杖自行吟徘徊望初日

十八盤題壁

絕壁一闕開羣峯勢壯哉門橫山脊裂澗打水頭摧雪
積晴嵐凍雲深白日頽危坡飛步上石路歎紆回

偕志白石王蘭君及兒阿洪遊滴水巖歸息三家
村逆旅醉後題壁

家貧戀微官難遂歸山志偷閒卽遊山險遠不暇計幸
有同懷客春來共著屐滴水探高巖仰山尋古寺神龍
妬詩人連日雨不霽恐我縋鑿徧攬盡靈秀氣悚然難

久留掉頭返城市留戀不忍去相呼飲村肆醉後書粉
牆塗抹不成字何年挂冠歸巖耕終此世

十八盤

躡屐登崇岡羊腸道重疊迴環境漸高騰身凌岌豈絕
頂關雄關崔嵬建樓堞怪峯衝門立扼人不許入陰壑
周如環危壁四圍夾俯視足欲墜仰觀頭將壓伫立不
敢前心神暗戰惴峽暗石氣涼澗狹陰風急彷彿蜀鳳
嶺未進先生怯努力下危途冷汗胸背浹

櫻桃溝道中望仰山

層巒歛步欲黃昏石徑春泥印屐痕萬樹青松雲裏寺
半山紅杏雨中村奇峯峭拔斜臨壁流水潺湲曲繞門
暮色促人難久駐低吟曳杖返仙源

晚仍宿
桃源

偕文鏡寰王蘭君之西山口占

揚鞭西郭絕埃塵雨霽芳郊日色新供養山靈無別物
一車載得兩詩人

龍泉寺題壁

萬里攢青逼寺危摩空一徑走逶迤峯開石筵骨亂出
巖裂壁分頭倒垂老樹擎雲蟠古洞寒泉盤澗注深池

興來不怕山靈笑醉掃蒼苔共寫詩

磕頭巖題壁

山雲吞行人裏人不許出天地忽不分峯巒盡迷失循
途彳亍行五步不辨物雨氣融羣峯陵谷化爲一舉足
冷烟纏開口濕霧噎昏昧不敢前伫立心驚惶安得仙
人來噓氣作風發衝破雲重圍救出垓心日

鳳凰嶺望妙峯山題壁

重岡複岫四圍環曲徑蟠空不可攀萬嶺參天朝古寺
一峯拔地鎮羣山磬聲吹落層雲外香氣飛騰霄漢閒

何必遠遊登泰岱此中幽絕卽仙寰

天泉寺題壁

陰壑曲復曲高深絕俗塵
洞幽龍作主寺僻虎爲鄰
峭壁難生草危巖不見人
乳泉著靈異漚滴幾千春

山行口占步鏡寰韻

回首高巖遠徐行不忍歸
雲開山脫帽烟起樹添衣
詩叟疲時卧村童健似飛
殘花猶滿路春老惜芳菲

登妙峯後大嶺

一身飄忽在虛空極目岡巒遠
近同萬嶺昏烟連朔漠

九天清磬落罡風飛騰直欲雲霄上呼吸真疑帝座通
不敢搔頭吟傑句崔嵬恐已逼蒼穹

看雲歌

蒼蒼兮茫茫兮濕雲四塞羣山埋峯巒一片沈陰霾五
步以外卽不可見雲頭觸面眸難開恍惚兮不知天地
日月在何處不知是晝是夜今何時心迷目眩不敢步
若涉大水其無涯大風發陰霧裂青天開紅日出狂呼
一躍登峰嶺披雲下視胸懷寬不見奇峯峭壁堆岬巘
不見長岡遠嶺排蜿蜒但見瑤花瓊絮鋪明鮮銀濤素

浪同飛翻日光照耀不可以注視漫漫一氣茫無邊疑
是山靈海若互遷徙暗將東海移西山不然便是神仙
移冬作夏恣遊戲故將大雪迷昇顏誰知殘雲黏山不
能遽散盡幻出雪海成奇觀俯視但見一白萬頃若平
地那識羣巖衆壑高高下下盡在其中閒若非長城高
山界其外直將包盡居庸以北諸岡巒迴風一攬雲忽
亂奇境迷離倏不見峯藏嶺露無定形谷往陵來數更
變雲飛風走山動搖是山是雲渾不辨須臾風止雲亦
無諸山盡出開畫圖

鮮花洞早起

睡起岡頭立巖巒四面環曉風驅宿霧曙色表羣山塵
夢今宵絕凡心頃刻刪安排作歸計襪被下烟鬟

石佛殿題壁

林壑繞重重徐行曳短筇只貪覓佳句忘却看奇峯雲
去山添瘦煙凝樹更濃欲留鴻爪跡到處紀遊踪

宿鮮花洞

峻嶺千尋屋六間暮烟暗淡鎖孱顏數聲人語遙穿樹
一逕燈光曲遶山縹緲仙雲迷翠岫微茫新月挂青鬟

俗來枕石寒床卧更析無聲戶不關

妙峯後大嶺看雲

狂風捲地衆山驚陰霧迷漫頃刻晴萬壑白雲翻雪海
四圍青嶂擁邊城茫茫遠塞蒼烟接皎皎當空烈日明
拍手狂歌豪興發高巖深谷盡傳聲

卽景

獨步高峯頂巖巒淨不埃雲開山躍出風轉雨收回怪
石迎人峙危崖夾道來新晴天氣好登眺興悠哉

望洋集

津門

大郡東南鎮繁華自古傳洪流連海岱曠野接幽燕地
滙諸河水津通萬國船揚帆尋禹跡故道尙昭然

三义河口

水聲寂寞市聲繁競渡人多盡日喧三岸錯排舟側入
雙流爭瀉浪迴翻帆檣歷亂連河口樓閣參差繞郭門
小立隄頭舒倦眼波光閃爍映朝暉

海門吟

浪捲蛟龍島嶼翻高檣百丈逐風奔潮衝斷岸開河口

沙擁飛濤限海門紫氣半天騰曉霧紅霞萬里湧朝暎
火船來往無人問故壘崔嵬慨尙存

大沽

萬戶沿流列東西舟楫繁河聲驚戰壘海氣暗荒村雨
過寒濤溢潮來濁浪翻鹽池饒厚利霸佐古風存

邦均鎮卧病思遊田盤不能悶作長歌

山靈怕我再作遊山詩洩盡田盤山水之靈奇使我卧
疾不能往北望雲樹空長思離家已半月去山僅廿里
勝境在邇不可到翹首烟嵐妬欲死恍如金盤玉筍羅

列滿几筵對食垂涎難染指又如美人可望不可親秀
影涓涓隔秋水原非東海以外三神山胡爲險阻艱難
竟如此始知事無大小不人由咫尺無緣卽萬里憶我
去年遊田盤龍潭猿洞窮躋攀二百年來人跡不到處
淋漓醉墨題雲烟登峰造極從來造物忌致令奇山在
眼難攀援此行大爲田盤惜無窮妙句埋沒胸懷閒山
靈山靈莫吾崇足不能登心已至歸家補作田盤詩了
我今歲遊山志

薊門懷古

霜滿孤城落葉翻
亂峯烟雨夕陽昏
三邊關塞連沙漠
萬里雲山拱薊門
少保功高營僅在
文皇軍去石空存
城東三臺營傳爲
戚少保屯兵處
盤山踞甲石傳爲
唐太宗遺跡
英雄事業銷沈盡
把酒登高斷客魂

早行

遠樹帶朝陽
青青接流水
不見有人家
但見炊烟起

段家嶺

聞說段家嶺
溫柔是此鄉
山光添鬢翠
雲氣入衣香
羅綺春如許
琵琶夜未央
繁華餘底事
茅店賸荒涼

段家嶺雜詩

羅衫未整翠鬟斜
搵淚看郎上錦車
記取重來休錯認
好峯對處是兒家

青樓翠館望重重
山色春情一樣濃
何必乘舟上巫峽
芳名應喚美人峰

峻嶺崇岡橫復斜
繞山歌舞鬪豪華
清淨俱堪戀

爭怪行人說段家

段家俗訛爲斷家
言至此盡忘家也

茅店房空晝掩扉
舊遊迴首事全非
美人散盡青山在

衰柳斜陽過客稀

遊田盤未至病股卧邦均半月而歸臨行留別田盤

遊山未至山徒歸心不喜縱使得至山境過樂亦已現
在雖有殊過去總如此幻境往不留達觀盡爾爾得遊
固足欣未遊亦何悔小住亦復佳終勝在城市權作已
遊觀病閒可歸矣

零星集

贈文鏡寰

嗟哉大不幸七歲亡我妣從父撫養大中道舍我

死靡弟復靡兄靡妹復靡姊孤窮哀莫告飢寒守妻子
室家久不諧伉儷同水火兩難癡且拙蚩蚩俱稚齒豈
其寡宗族疎遠難依倚昏媾寇仇等緩急更難恃我生
喜交遊結納遍遠邇勢力肆徵逐泛濫傷比匪縞紵隱
戈矛酒食藏鉤餌叶膠漆雖不乏心交亦無幾惟君最
長厚性情洽無比匪惟所長同所短亦相似我性好吟
哦沈湎困酒醴君亦詩如命酣飲日無已我性夙庸懦
治家乏綱紀君亦甘廢棄自誤不知悔我性昧世道疎
狂傴儀禮君亦恥合俗行止招觸抵仕隱雖各殊家計

同如洗老壯時縱判頽廢總難起才高人盡妬性僻世
同訾浮沈紅塵中到處蒙羞恥誓將與君盟相約爲昆
弟永作忘年交不恤俗人罪願共葆此心勿從流俗徙
生同爲狂人死同爲狂鬼腕底詩如山胸中酒如海優
游乾坤閒去住聽真宰骨朽才不朽形改心不改十二
萬年後混沌同消毀

湖上

索句高亭外披襟倚石墻波紋皺樹影水氣潤花香宿
雨朝初霽秋風晚漸涼徘徊嬾歸去冉冉已斜陽

同文仲恭訪樂惟勤一路寒甚口占二十八字贈

惟勤

風掃黃沙亂暮雲驅車河上趁斜曛
莫嫌冒凍重相訪半爲青山半爲君

正月曾與仲恭同訪

蘆溝橋

桑乾東下二千里穿破太行山萬重
兩岸大開東難住一橋橫立當其衝
急流突野奪奔馬巨浪翻沙驚蟄龍
治水何人有良策烟濤終古總汹汹

西峯寺

古刹西峯舊幽深遠俗塵樹留三代影花駐四時春
殿圯壁猶在池荒田未湮戒壇瞻壯麗衰盛亦前因
寺有銀杏
宋時物後有泉名勝泉有
月季花高丈餘冬尙花

自石厰至李家峪

幽峪無風夕照溫撥雲尋道共攀援滿山黃葉不知徑
隔澗紅牆半露門四面嵐光圍古寺半林秋色染荒村
西峯壯觀全銷歇破壁參差慨尙存
西峯寺在李家峪

蘆溝橋

狂風掀浪撼孤城攬轡高橋魂魄驚一水南流趨渤海

萬山東走擁燕京寒潮倒捲層冰裂急溜橫翻亂石鳴
卽目洪濤遍荒野灾黎何處事春耕

窮居

困頓守蓬巷□□□□□偷兒慵入室逋客厭登門食
少詩先瘦衾寒夢不溫窮居蕭索甚此意向誰言

莫漫誇清貴神仙劇可歎位卑謀食急累重棄官難蓬
島雲霞少瀛洲草木寒會當求辟穀不必勸加餐

使越集

癸酉

蘆溝橋

風掃殘雲宿雨收
征輶傍午渡蘆溝
洪濤觸岸石半裂
急溜擁河橋欲浮
浪捲荒沙翻滾滾
瀾迴大埜去悠悠
此行莫起離鄉感
放眼江湖是壯遊

涿州

盡日奔波道阻長
荒城一角望蒼茫
三橋橫野界流水
雙塔夾門分夕陽
途路乍經身倍倦
家園新別意難忘
京華漸遠風光異
村落凋零劇可傷

平原二十里鋪題壁

門客空多技莫施
三千坐食欲何爲
兩般利器良堪寶

辯士辭同壯士樵

一杯獨對蠟燈紅拍案狂吟氣倍雄
欲作平原十日飲征輶無奈太匆匆

七夕宿晏城旅舍偶成

旅舍孤燈伴客愁故園千里路悠悠
今宵莫訝天無雨都化離人眼淚流

齊河縣渡河

風靜洪波歛扁舟渡水遲山遮平野斷
城踞大河危奇景喜初歷離人休自悲
登臨隨處好努力賦新詩

崔家莊旅舍題壁

與夫晨命駕，遄行凌穹窿。岡巒繞曲折，迷離忘西東。嶺外日未出，峰頭石先紅。晨光醒林薄，烟靄開冥濛。徑斷橫嶺續，崖絕深壑通。迴環四五里，復見村前峯。嶺缺雲氣湧，恍惚窺岱宗。層巒聳蒼翠，峭拔摩高空。神光標靈秀，不與諸山同。會當凌絕頂，縱覽開塵胸。

南天門

青天開門當頭壓，蒼崖劈破排雙峽。峽高千仞五尺狹，直上青天一徑夾。梯山作徑石爲級，下梯未盡上梯接。

萬級相銜徑直立梯高級仄不容屨雲霧蒸苔級滑濕
進步股戰退難跼兩厓對立蒼穹插石骨刀削烏難集

鐵龍雙垂鎖我業虎豹震驚魑魅泣

門外夾路兩鐵鎖予以爲如太華爲

人攀援以登輿夫云以之鎖天門十八盤

崔嵬天上開閭闔紅霞百仞排危

堞巨石當關不許入昂頭伫視魂震懼鼓勇奮身升岌
豈仙雲拂面天風急天關搔首通呼吸低頭俯視汗背
浹一墜萬丈□□雲中琳宮聳層疊神斤鬼斧胡年
葺會當策杖絕頂躡

伴賊題壁

山自齊河南開山起至此止

凌空亂綻碧芙蓉
巖壑縱橫夾道從
峽嶺迴頭成絕澗
平岡轉面變奇峰
迢遙齊魯五百里
曲折秦蒙千萬重
驛路匆匆難久駐
歸來待我再扶筇

曹莊食煎餅豆漿口占

荒村寂寞駐輶車
楊柳絲絲拂地斜
煎餅豆漿餐得飽
生來風味愛田家

郊城十里鋪題壁

旅館無人夕照遲
倚窓獨坐倦支頤
縱橫粉壁詩題滿
盡是思家憶舊詞

紅花埠題壁

埠南卽江南宿遷境

奔馳盡日不停驂
旅况鄉愁兩不堪
此地離家已千里
今宵聞說到江南

夜登泰山

雲境清幽絕俗氛
嵐光夜色共氤氲
淵深不見惟聞水
谷暗難分半是雲
嶺外昏烟迷漠漠
林梢細雨落紛紛
平生夙有看山癖
莫笑登遊意太殷
徐季和恐余夜行
危險極力阻止余
心感其厚意而興不
可止遂乘夜上山

王家營題壁

山河處處送征驂
拍掌狂吟興正酣
荒館倦郵牆抹遍
題詩一路到江南

寄懷文仲恭

仲恭新斷絃悼亡詩極多

星輶促迫不容遲
未得臨歧話別離
寄語多情荀奉倩
秋風珍重少吟詩

揚州舟上偶成寄京中故人

鼓吹喧譁鬧水湄
縣官迎送吏胥隨
江湖落拓遊無禁
妬煞當年杜牧之

笙歌何處問迷樓
行酒傳花枉憶歐
寄語京華諸故舊

於今名士不風流、

傍午孤舟泊水涯
蓬窓倦卧旅情賒
揚州莫怪難成夢
一縷離魂尙在家

吳門夜泊

夜泊吳門旅興增
檣帆繞郭列層層
橋邊舟報三更鼓
水底樓明兩岸燈
幾陣廉纖微雨滴
半空黶黶溼雲凝
勾吳故蹟千秋著
躡屐尋幽恨未能

瓜州夜泊

野曠烟昏月未升
波心夜泊旅愁增
荒洲戍近先聞鼓

遠浦舟來但見燈拍岸風濤流滾滾隔隄雲樹望層層
唐家舊鎮今何在翹首江天歎廢興

岱宗行

古今聖人不一人惟我夫子超羣倫來開往繼維乾坤
天下名山非一山惟此泰岳尊齊天挺然獨立青充閒
蓋倚輿扶神秀鍾爲五嶽長稱岱宗維嶽降神誕至聖
人山兩絕天之東吁嗟乎岱宗之高吾不知其幾萬仞
岱宗之大吾不知其幾千里岱宗之神吾不知其幾萬
載青齊綠魯形崔嵬上拂天河下壓海陽司人生陰司

死一山收盡九州鬼七十二君同登封玉書金簡蟠虬
龍不崇朝而雨天下東巡柴望欽神功秦碑漢碣不足
數春朝鉅典明堂隆南衡北恆中嵩西華各分據五岳
冠首同推崇亦如伊任夷清惠和互稱聖惟此聖之時
者爲中庸不與羣峯鬪秀奇不與衆壑爭險危巖巖氣
象自足壓一切下視千巖萬壑皆成卑譬彼夫子之道
忠恕而已矣索隱行怪將何爲龜蒙鳧繹莫肩及何論
新甫兼徂徠天門絕頂懸雲梯我來鼓勇窮攀躋登此
果然小天下詩曰高山仰止景行行止此語三復之

無錫舟中作

乘風南下水悠悠波影嵐光豁兩眸
分付榜人橈莫急
慧山一路送行舟

吳門舟中曉望

破曉孤舟出碧津風吹細雨洒紛紛
遠山一片迷難辨
半是炊烟半是雲

石門舟中卽景

風翻輕浪碧悠悠兩岸桑林送客舟
莫訝此閒風景異
水光山色近杭州

劉伯倫墓

醉倒荒原死便埋
糟臺千載卧枯骸
九原若有還魂藥
與我開樽破旅懷

蘇小小墓

離離秋草沒平原
豔跡千年喜尙存
迴首燕山杳天末
荒郊無處弔香魂

舟抵武林喜而成詠

三千里路望悠悠
驛間吳山駐客舟
酌酒蓬窓聊自賀
今生竟得到杭州

入杭州城肩輿折轅落地半時之久始易輿行往
來觀者如堵戲作

輿顛轅折欲行難滿巷遊人看試官自笑丰姿非叔寶
何妨安坐任人看

使館卽景

院宇深深隔幾重風飄丹桂異香濃高樓百尺憑窓立
恰對吳山第一峯

癸乙禱鈔集

上

答陳槐庭見贈

癸

我愛槐庭叟
口口脫俗塵
湖山羈傲吏
詩酒老閒身
覓句心思苦
論文眼界新
槐庭能詩是科分房取文不尙墨裁
瓊瑤難作報
律法繼前人

寄延小舫
小舫需次杭州艱苦萬狀恐其因貧
廢詩寄此以廣其懷

人生本如夢
隨遇可自安
但得餓不死
何用憂飢寒
武林名勝地
市城有湖山
閒居自可樂
何必求美官
強如守故鄉
奔走塵土閒
舌畔養妻子
終日嗟寒酸
我官雖清美
亦復憂兩餐
紅埃膩足脛
有山難追攀
西湖浸胸臆

臆繫念銷除難可恨夢魂俗不肯常往還勸君多爲詩
詩工自遷官不見楊學士御書屏十聯

偶成

東山遊罷又西山翠壁丹崖到處攀寄語妝臺休悵望
白雲留我不容還

少伯看山遠泛舟嬌慵西子不同遊五湖風急歸帆速
獨倚蓬窓莫謾愁

酒肆題壁

甲

回首光陰似轉輪卅年憔悴苦吟身聊將醉眼看今世

不羈詩心讓古人
綠醕杯空人已倦
紅爐火暖室如春
狂歌拍案聲相答
禰坐歡呼忘主賓

滴水巖題壁

甲

上天竺僧贈我茶云是產自白雲峰攜來此閒一烹飲
胸懷頓覺生清風山野滋味軟塵俗不數餠鳳兼園龍
擎杯靜坐各無語萬籟不動青山空憶我去歲過無錫
惠山繫纜躋禪宮第二泉上試新茗天漿乞取旋征蓬
中冷久塞未許汲放棹徒過心忡忡俗士好名不解實
重遠輕邇存私衷茲泉僻處孰領取終歲寂寞稀遊踪

山僧野豎任污浣菜根洗滌充殮饗從古微寒出奇土
下僚埋沒多英雄門戶分別宦途隘物色誰到風塵中
吁嗟乎下僚埋沒多英雄茫茫斯世今古同

長新店旅舍題壁

甲

寒暑馳驅道路中歸來依舊使車空糟糠見面應相笑
故態狂奴與昔同

武林山水恣遨遊是處揮毫妙句留寄語西湖莫相憶
詩人今已到 皇州

洞庭山莫釐峰口占

癸

泛罷西湖泛太湖新詩塗抹遍三吳酒酣欲向山靈問
曾見疎狂似我無

惠山題壁 癸

我經無錫登惠山禪宮小憇嘗甘泉一泓見底絕塵垢
照人凜然清心肝碧螺春茗煮初熟入口頃刻消焦煩
中冷湮塞僅名在屈居第二良呼冤忠義新祠建山半
茶餘策杖重躋攀粉牆丹柱表壯麗樓閣高下排迴環
凭高縱目快胸臆金無兩邑窓櫺閒小城如村河如瀆
凍野凝碧開平田夕陽促人久難駐遐邇暮色同蒼然

冷嵐鎖錮陰霧暗鬼燈照水泉流殷山魑木魅不敢出
英魂呵護靈風寒名區遊覽興難盡泉香留舌塵懷剛
仙漿乞得返京國白雲採取重烹煎

碧螺春茶名產洞庭山白雲亦茶名

產白雲峰余從廟祝乞泉一器載歸京作第二泉會

滴水巖題壁

乙

幽壑隱香剎摩空古殿懸眼前生絕壁頭上落寒泉
曲疑無路巖高罕見天山僧能醉客枕石共酣眠

自三家村至桃源

乙

前峰後嶺連青蒼峰迴路轉山徑長桃花半落杏初放

韶光斷續春山香山村迢遞藏花裏茅廬隱約奇峰倚
幾聲犬吠隔花聞半林夕照炊烟起

虎邱題壁

癸

臺空僧不來池荒劍難見頑石果有知點頭應自歎

送秦秋伊

樹敏

下第南歸兼示王公玉

甲

天待詩人有常例好詩必使其人窮我與秦子皆好詩
其遇不同其窮同我生年少掇科第玉堂金馬榮春風
虛名雖豐實利嗇清寒徹骨書囊空周王臺高足易墜
張侯槎小身難容桃李新栽少濃蔭使星光斂愁雲蒙

秦子生平幸溫飽場屋久困難爭雄四十登科氣少吐
禮闈戰北摧幽衷蓬山水阻草涇碧杏苑雨急花凋紅
文章憎命命莫拘筆墨何必求精工更有王君亦詩癖
終歲守硯憐雕蟲青衿固結不可脫飢寒到處身飄蓬
名利兩窮不一得天壤無地存微躬泥塗軒冕盡可哭
人生何用分窮通窮人相值倍相契唱酬正可常追從
何爲復使不久聚會晏別早眞匆匆天南地北隔江海
舟車何日堪重逢縱使握手日匪遠臨歧何以排離悰
會當挂冠從君往掉頭同入東海東三山分據作吟席

醉墨灑遍蓬萊宮其奈窮愁縛難放塵緣纏糾同牢籠
仰天長嘯放君去殘陽半落雲朦朧

雪後遊平山堂

癸

高堂風景詔無雙乘興登臨啓碧窓四野凍烟凝夕照
萬山殘雪壓長江岡分蜀地名先著詩讀歐公氣早降
勝地留連忍歸去石樓幾杵暮鐘撞

上天竺題壁

癸

禪關傳法喜地僻遠塵氛三寺遞清磬兩峯爭白雲
上
下三天竺相接南谷深人罕遇林密徑難分中有高僧
高北高兩峯相對

在名香日夜焚

題法喜寺方丈小照

癸

落伽分別業暇日許攀登古佛有奇劫

寺奉大士靈甚寺曾遭兵燹像

失去後見井中有光復奉以出

名山無俗僧延賓供飲饌愛客借香燈

展卷留泥爪重逢何日能

夜遊三潭印月題壁

癸

禪宮高踞浪中央秉燭登遊夜氣涼三塔壓潭分月影
雙隄界水劃湖光潛魚潑刺躍蘆渚宿雁悠揚鳴柳塘
莫怪宵深不歸去狂奴醉後興尤狂

雲棲題壁

癸

古刹隱幽谷岡巒四面環雲深難辨寺竹密不知山夾
道老杉碧銜林夕照殷幾時重策杖借榻翠微閒

開化寺六和塔題壁

癸

一塔壓濤頭江山四望收窓中走舟楫階下聚龍虬巨
浪連空湧奇峰隔岸浮梵宮留敗堵登眺動人愁

謁孤山二林公墓題壁

癸

孤峰嶢嶢列雙墳放鶴亭空冷夕曛湖水澄清山色碧
忠臣高士許平分

五雲山眞際寺題壁

癸

隔林斷續晚鐘撞
獨上僧樓倚碧窓
萬壑昏烟迷峻嶺
一條殘照閃長江
竹陰疎密連樵徑
松影參差護石幢
到此直疑天外立
五雲高迥本無雙

偕如冠九雲蔚生登韜光寺題壁

癸

密竹蕭森徑不明
登臨遠眺趁新晴
萬重高嶺檻前立
一片大江門外橫
描繪須煩名士筆
追陪深見故人情
冠九工詩畫許畫
韜光送別圖二
君皆年老因陪余
皆步行甚勞
山僧導客看龍種
落葉飄零池水清
寺有池出物似
壁虎云是龍種

焦山定慧寺醉後書帶戲贈芥航上人

癸

金帶非同玉帶竹坡敢望東坡好古別有妙法不落前人曰窠

泛舟鴛鴦湖烟雨樓題壁

高樓荒廢幾經年倚檻臨風獨黯然一片荒城帶孤塔
半湖殘照斷寒烟登遊倍動騷人感修葺深欽地主賢
樓毀於兵許雪門太守客路匆匆難久駐揮毫權了雪
重葺之弁有鴛湖八詠

泥緣

十月望鴛鴦湖泛月醉後偶成

癸

前月旣望遊西湖山光月色同畫圖今日鴛湖復見月
明月無異山水殊故鄉昆明湖亦好此夕月光應皎皎
無方縮地空相思南北清輝望杳杳人生求樂非求愁
眼前佳境胡不遊無烟無雨夜皎潔月光水影寒高樓
竹垞老人今何在勝地荒蕪歎更改有酒不飲無乃愚
醉死湖心復何悔西湖有月誰再觀昆明有月何日看
過去未來總虛幻現在放過追尋難世閒萬事皆爾爾
仰頭此月俛此水